

唐  
文  
拾  
遺

唐文拾遺卷之三十二

榮祿大夫三品頂戴前分巡廣東高廉道加四級臣陸心源輯

李郴

郴咸通中守京兆府參軍長安尉轉監察御史終祕書郎

唐祕書省祕書郎李君夫人宇文氏墓誌銘

并序

夫人姓宇文氏初代武川人太和中遷居洛陽遂爲河南人也其先因瑞命氏周紀備詳至於尊爵顯名勳烈赫赫者則史不絕書矣高祖遠感皇任梁王掾曾祖成器皇任絳州翼城縣丞贈禮部員外郎祖選

皇任御史中丞左遷澧州刺史贈太尉父瓚見任右散騎常侍常侍公娶故太子司議郎博陵崔櫓女夫人年始十餘歲而崔夫人亡喪禮成人識者異之而又生稟直氣幼知禮法言必聳尊卑之聽動不假保傅之訓雍睦兄弟令族罕儔組繡奇工之暇獨掩身研書偷翫經籍潛學密識人不能探工五言七言詩詞皆雅正常侍公每賢之爲人曰是女當宜配科名人咸通甲申歲因丞相今宛陵楊公媒適隴西李郴任以內事夫人姓鄱華飭而安儉薄時郴守官京兆府參軍也明年郴改長安尉其夏轉監察御史裏行

充湖南都團練判官又明年勅拜祕書郎其赴職也  
攜手同去其拜官也偕行而來又明年春夫人得疾  
長安宣平里九十日啓手足而化是歲丁亥夏四月  
辛卯享年參拾有壹常侍公哀慟致疾其於追傷痛  
慟如掌失明珠耳由三族六姻無不泣涕如雨以其  
年八月壬申歸葬長安縣承平鄉龍首原南劉村祔  
先塋禮也有子四人女二人長曰召前婺州義烏縣  
尉次曰吉前宣州溧水縣尉次曰占授滁州永陽縣  
主簿以親喪不之任幼曰同前明經郴執筆追悼因  
誌于石銘曰

夫人爲女兮既孝且明夫人爲婦兮既順而貞何善則周兮其福不并何松之茂兮而柳之榮無所詰問兮地幽天冥親者泣血兮疏者涕零謹其終始兮而刻斯銘悲哉夫人兮永閔泉扃

石刻

李纓

纓咸通中魏王府參軍

唐魏王府參軍李纓亡妻弘農楊氏夫人墓誌

銘并序

夫人諱蕙字廷秀弘農人也遠祖漢太尉博綜經史著在人聞馳聲古今世爲之關西孔子史策有傳曾

祖諱元寂皇任宣州刺史御史大夫贈吏部尚書王  
父諱申皇任武甯軍節度判官兼殿中侍御史懿行  
洽聞迥出羣表父鶴前任京兆府三原縣主簿性稟  
孤標韻含雅操居蓮府傳清廉之譽處縣曹多撫育  
之仁夫人卽三原君之長女也家傳簪組世襲儒風  
華族分輝慶門疊耀行著閩閩德比芝蘭辯慧生知  
天與其性逮歸李氏賢如處家淑德已播於六親孝  
敬夙彰於九族昭昭婦道肅肅雍和宜爾室家必期  
榮顯事姑能竭其力無愧於孟光爲婦足見其心何  
慙於漆室纓家素寒福官宦且卑物用不自饒所向

皆多闕夫人未常戚戚於顏色孜孜於博求就糲推  
甘夫人之道具周矣內外恬和尊卑敬順親戚咸謂  
家肥耶夫人女工刀尺悉盡其能至於絲竹多所留  
心就中胡琴尤是所善嗚呼痛哉從茲雅音絕矣余  
今冬赴調或補一官上以奉旨甘下以資中饋道期  
方泰共保榮華何屆福善禍淫天何奪耶邁疾周歲  
醫藥無瘳旣纏二豎之悲俄及九泉之歎以咸通癸  
巳歲九月廿二日以疾終于永甯里之私第享年廿  
有九夫人歸我五年祇生一子不福其善早已殮亡  
以其年十二月廿三日歸窆于京兆府萬年縣小陽

村祔先塋之側禮也夫人有尸鳩之行慮闕而不書  
不若纓自誌其銘曰

疾波東注滔滔不歸雅傳婦德克著母儀事長肅肅  
撫幼怡怡夫人既往余將何求

石刻

禹璜

璜安陽縣令

靈泉寺題記

圃人禹璜以咸通八年五月自宗城拜安陽是月十  
八日較夏租面寶山之崔嵬稅車半日捫蘿環澗力  
拓危峰矚盟津於前眄常山於後左揖泰嶽右俯砥

莘流情肆目獨暢其巔雖乘查之間霄漢入壺而觀  
太虛未必多此十九日紀從者鐵兒阿用十四

明年夏五月廿八日又擢麥租再遊午寺頗息塵思

禹璜記

安陽縣  
金石錄

朱洪

洪咸通中人

古山索靖廟碑

昔古茹毛飲血尙建神祠土鼓簣桴窪尊坏飲酌元  
酒以享上帝猶能澤及於民是以必先成民然後致  
力於神蓋民神之主也自有聚落陬隅人旣安居必

葺祠宇以爲鄉人祈有年之所也是故甸都邱邑必有社稷社稷五祀祭乃有由斯皆德及於民雖沒遐年血食彘盛不敢輕廢今此古山之祠亦其然也按吳王號索靖謚曰文皇帝其姓孫氏諱和吳主大帝權之仲子後漢張伯英之出也伯英書善草隸而有勇力能索鐵甲旣大帝權之崩諸子皆嗣父而立靖獨拂衣別業於吳興居焉有如泰伯三讓之德矣於是訓示民知父子君臣之道時吳蜀分擾決鋒決鏑靖以雄威禦境及子皓立皓感父高邁遂謚索靖文皇帝文謚也謚法曰愛民慈惠曰文今吳興之民共

懷甘棠之詠因請立廟於雩水之南焉今此地亦吳人也古山里人追而祭之迺立廟於古山之隙地咸通十一年夏洪潦大淹堂宇流浪至念當作三年春

卽有沈君曰某者更廣其地巍構軒堂沈君思齋記斯事願乞余言余觀萬化幽元莫能窮究聊具年月日以副來意湖州府志

李藝

藝咸通中人按與全文六百八十二李藝別

唐故潁川郡陳府君墓誌銘 并序

府君諱直其先口州潁川郡人也後乃遷口錢塘縣

而家焉曾祖滔皇試登仕郎新易州易縣尉祖義皇  
試文林郎愛州九真縣尉考及並遁跡雲林高尚不  
仕府君卽先考之長子也稟性疏達德惟雅操言不  
宿諾行不鞫從內已嚴格外已溫恭少小習儒長從  
詩史鄉黨稱孝親戚稱慈何期積善無徵以咸通五  
年歲次甲申五月廿一日寢嬰微疾百療不痊終於  
錢唐縣方興鄉金牛里私第享年六十有九娶譙國  
郡蔣氏有嗣覆陰早失有子四人長曰存祐娶渤海  
吳氏有孫一人曰郁郎女孫二人姪娘春娘次曰存  
議存制娶潁陽范氏存約等幼集儒墨強學爲文每

以仁行理其心常以孝義存其道不以縱口溢其心  
不以繁華飾其體有女四人長女適周氏早歸幽夜  
次女適章氏次女十三娘閨幃友逝鳳舞沈幽小女  
十四娘在室有絡秀之材道蘊之學四德俱備三從  
母儀內睦外和六親謙順各毀不踰禮望丹旄而痛  
心隨孤魂而滴血妹二十五娘適李氏嗟惟庭樹之  
摧長乖鄺萼十八娘適滕氏素質早歸泉扃嗚呼逝  
水難住何新不故既享黃髮之期萬皆盡度乃已元  
龜宅兆卜筮三從以其年八月十八日窆於履泰鄉  
步渚原亦俗里考妣之先塋禮也扶風子寓寄鄰止

得鄉黨之名實謂其往若休炳然斯文用垂於後銘

口

千秋冥冥松青蕭索山雲晝陰隲月朝落秋風蕭蕭  
兮寒水淥長江一去兮無迴復冥冥魂魄兮何所依  
兒女肝腸兮斷難續天地日月何沈昏猗歟克己兮  
命不存傷哉此去不復返千秋萬古扁泉門

古刻  
叢鈔

程山甫

山甫江西人咸通中布衣隱居廬岳

唐臨江郡故何長史府君墓誌銘

并序

有唐臨江郡府君何氏諱俛字太常則唐叔虞孫韓

氏之苗裔鳳池曾公之遠允因道趾廬阜遂家于江  
州尋陽縣丹桂鄉香谷里皇朝請郎試左武衛長史  
退居雲林高尙其仕高祖諱元琮曾祖諱承裕祖諱  
勣考諱溥長兄諱建次兄諱鎰外清河郡張氏府君  
婚汝南郡周氏生三男長曰元廣婚周氏次曰友稜  
先婚嚴氏次查氏李氏歆獻俱不幸先歿次曰元袞  
婚周氏次曰元壽婚彭氏元壽外丹楊朱氏親姻茂  
盛孰如是焉府君淑順恭信行德謙柔福會良疇高  
蹈雲水美玉不炫聲價益高素琴不調五音自足百  
祿雖備壽不永脩斯天之貽咎何神理能保其至德

哉以咸通七年歲次丙戌七月廿五日臥疾逾月終  
於私第享齡六十有六以其年十一月壬寅朔十九  
日庚申卜其窀穸於大塋之內而窆焉崗巒興伏羣  
岫低昂雲水縈流溪谷迴合卽何氏異世之所授耶  
府君性行秉質清真坦夷介潔無虞直道自處嗚呼  
明星滅曜劍墜平津雲鎖碧山霧郁寒水親朋痛切  
閭里哀傷楚悼之情悲莫能已廣稜衮壽等仁貌蘊  
叶行恪溫儒材器天資□標郡里次子稜讀書爲文  
脩進士業早以繼承怙恃未赴貢幃業盛昌晞名譽  
高遠林巒得志守節義謙素其間居上下無怨至其

四方之人咸相謂曰何君卽今之賢達之士也其第  
三子袞又法名思齊性好元門身披羽服堅持科誡  
食柏餌芝志樂煙霞逍遙冲寂山甫不揆瑣昧叨竊  
煙霞側聆休風輒錄斯序廣等馮墓泣血託爲撰述  
□誌銘曰

鳳池遠裔德並嵩萊郡閭領袖邦國良材志奪冰霜  
□同秋月劒剗琨犀□□明節日月逝矣德辰一沈  
鄰杵無相百牙絕琴大塋之域茱萸原東□實誰墓

長史何公

古刻  
叢鈔

李直

直系出趙郡咸通中人

唐扶風馬氏故夫人清河張氏墓誌銘 并序

夫人諱慶本望清河郡人也夫人卽公之長女也  
夫人立性柔和齷亂知禮閨門之教不肅而成及以  
笄年歸于扶風馬氏琴瑟諧韻幾移星霜敬夫如賓  
卹下如子□□何顯□情易隔□花見□何置忽染  
激疾藥餌無徵以咸通四年□□□沒於天長鄉  
之私室春秋五十有八親愛情慟缺入難照長夜本  
姻結髮同於百年事與願違缺入璠璣將仕郎前守  
亳州鹿邑縣尉以缺十字 陳州項城縣尉□□修己□

仕郎

缺十  
二字

將仕郎□□陳州項城縣主簿

缺十  
二字

有女

二人長女適渤海吳氏次女適項城

缺八  
字

匍匐主喪

孝過於禮銜恤問禮恭修齋祭無不頌誠□□恭悲  
逾於常禮以當年五月廿七日安葬于杭州鹽官縣  
西□里海昌鄉秧田村昌宓里買得郁師周地東至  
孫晔西至郁師周南至□浜北至郁爲新塋禮也墳  
隴儼成雖存沒異路夫妻□□莫大焉伏恐桑田  
改變陵谷難分因刊貞石乃爲銘曰

肅肅爲人德行先□幽明易分恩愛難別紅顏旣無  
白日先沒徒感松風空悲壠月廣□直書千歲不□

海昌  
備志

許舟

舟咸通中鄉貢進士攝幽州大都督府參軍

唐故幽州隨使節度押衙正議大夫檢校國子

祭酒兼侍御史上柱國太原王府君夫人清

河張氏台祔墓誌銘

并序

府君之先周靈之後秦有翦而漢有吉晉有導而齊  
有儉泊乎貴業繁盛高原三分或撫俗中區或字兵  
窮衰蘭蓀衍馥寔爲飽其風光杞梓垂榮誰可殫其  
簡牘曾祖諱清皇前攝貝州錄事參軍祖諱選皇前

攝瀛州河間縣尉列考諱盈皇銀青光祿大夫檢校  
鴻臚卿府君卽令嗣也諱公晟字嗣復義冠金石量  
縮河嶽動息成韻恩威有文叱吒而生谷風談笑而  
揚春卉由勇張貞猿臂席髭一諾千金致命如往元  
戎以挺生襟抱迥出人寰初其宿衛之資終致建牙  
之署事家邦而不危人望輸忠赤而獨擅君恩何當  
匪石之誠忽掩虞泉之恨嗚呼享年六十九以咸通  
十一年庚寅歲夏六月二日屬纊於薊縣軍都坊之  
私弟以八月四日成事於幽都縣保大鄉樊村里之  
高原終其禮也夫人清河張氏結髮移天敬承禋祀

豈期超忽先之去流聞壺柔明孰云箴誠以茲良兆  
可耐所天有子四人長曰宏太攝薊州三河縣丞幼  
敏公忠頗開吏理方圖晚器倏謝明時次曰宏雅閎  
禮敦詩親人重義授以文職優之漸鴻補充節度駢  
使官次曰宏寂履行趨庭方宜仕進祇皇靡叶鞠爲  
泉人次曰宏楚情韜百行心佩五常仗文武之全材  
爲國家之模範補充節度衙前散虞候於戲天道污  
隆人經否泰雖藏舟欲固而覆軌難移導其道而奚  
所悲履其理而竟何恨令子伏壘飲溢假喘興言事  
恐陵谷推遷高卑迭運固命荒鯁誌於他齡銘曰

天降英靈兮壯我雄方  
弼諧造化兮爲棟爲梁  
施武力兮折銳摧剛  
勤王事兮披肝倒腸  
上天速禍兮殪忠良  
抱堅白兮歸泉堂  
逝川杳日只如此  
松檟風生徒自傷

古誌  
石華

胡錡

錡咸通間進士

賀曹尚書子希幹及第啓節句

桂枝折處著萊子之采  
衣楊葉穿時用魯連之舊箭  
分之名 一千里外觀上國之風光  
第故也 十萬軍前展長安

之春色

唐詩

段公路

公路東牟人鄒平公文昌孫萬年縣尉著有北戶錄  
禱孟公祝詞

公路咸通辛卯年從茂名歸南海陸盡東口行次水  
程舟人具牢醴以祭船神請愚爲祝詞曰

歲在單闕時及朱明柳絮風老桃華水平倚欄櫂兮  
淺岸張布帆兮長汀粵有舟子請禱玄冥孟家遂卽  
建高檣開左郭列牲牴呼著作召靈胥邀海若對蛟  
浦而烹牢當鹿床而命爵於是具六味羅八珍羽毛  
咸備蘇膏心陳剖蠅陸兮合雜剝博帶兮續紛螃玉

色魚錦文噎鳩餅脆騎驢酒新無非可口兼乃着人  
果則獨根橄欖焦核荔枝三節肝膈細腰蹙谷署預  
蠶齋素藉烏裊委盤纂纂堆案離離更有越方之儔  
解悟之輩或衣朱裳或塗翠黛奏曲搗絃燃膠熬蕙  
初敘訶而迴瞻遂傳詞而連嘒詞云神下降兮龍驤  
巫歡喜兮鼠態駕雷電兮熒煌擁煙雲兮靉黶又曰  
船容窳兮何在櫓安穩兮徘徊絕駕波兮此去隨駛

潮兮揭來

北戶錄

馬郁

郁咸通中鄉貢進士

維唐故隴西李府君墓誌銘 并序

顏子淵死孔子曰德行厥躬不實殂落命矣夫盛哉  
歟府君之德壽也府君名扶其本黃帝孫顓頊之後  
自周秦漢代翼衛正道軒冕不絕至後漢治書御史  
諱楷生五子三子從居趙派爲東南西宅是爲趙郡  
三祖二子流寓隴西成紀而子孫因其家焉府君卽  
成紀之後也曾祖諱紹清名蓋代素節不仕祖諱愔  
抱經緯蓋世之才負宏奧不羈之略嘗以珠紫爲玷  
行之服簪纓爲拘身之械固避世林泉恥於諂諛詭  
佞樂道不仕大父諱曼少耽詩酒長傲風雲逸器不

羣壯心獨步直志難摧猷弃浮名處士終老府君卽處士之子也幼而聰敏長抱全才侷儻英明智有餘幼冠歲志學有聚螢積雪之勤無便僻進取之佞承先人之遺志也優游雲水靡不臻涉厓青蒲以南據吳渚北倚秦泐崗原膏腴封疆秀楸周眎慨然遂有栖止之趣於是居焉及寓于此二十餘載官僚親仁閭里仰重門環多士到屣之清風大行席擁琴書雅韻之良音滿室悲夫以咸通四年六月廿九日終于杜父里之第享年六十九嗚噫生也人敬之歿也人思之餘芳藹然經時益茂不朽之譽孰過於斯繇是

君子佳之嗣子鉢得先人遺德不墜弓裘沉靜而潔  
己清啓慧而藝能箸夫人彭城劉氏少聳婦德長峻  
母儀柔淑治聞規矩可範生二女一人適東海徐遜  
千卷書生一枝晉郟一人從天水趙邯秀又温明松  
秋玉朗夫人汝南周氏植德無徵早從風燭生嗣子  
翼教有方致茲右德育二女一人許嫁河東衛從狀  
貫英華傑出人表一人歸北海儲瑜温潤而珪璋比  
容峭直而松筠並秀蓋府君之良選也咸抱怛腹之  
材皆負孤標之格嗣子娶東海徐氏前進士羣之愛  
女也箴規自得於家風儒墨傑彰於君父嗚呼子婚

身立女配合德君之幹歟家肥道直歿無餘累君之  
強歟兆於形有生死苦樂以兒女之情悲夫至明年  
二月十三日卜葬于縣之兌宜陵鄉白露里之原銖  
號泣而言曰慮陵谷遷越俾陳辭刻石郁性本無文  
謬居是邑久嚮嘉譽因敢直書握管凄神乃爲銘云  
大患旣形兮賢愚不一稟生知兮秀而何實必承勢  
兮以浮以沉分明滅兮終得終失奄利刃於黃泉埋  
金石於白日在火玉兮寒色凜然扇重匣兮劍光逾  
出冀神明兮不昧無欺厚子孫兮祿壽彌溢

石刻

張元勿

元勿咸通朝御食使登事郎上柱國賜緋魚袋

唐故朝議郎守徐州功曹參軍上柱國劉公墓

誌銘

公諱仕備字元同彭城人也祖諱光奇開府知內侍  
省事父皇諱英閭特進太夫人楊氏妻張氏先終公  
有二女長適田氏次適張氏二男曰壽郎先逝次曰  
齊宴年十二公氣含清韻獨異貞姿業廣藝深事皆  
天假孤標狀喬松之拔眾林明質若秋壻之懸碧落  
溫恭克己節儉終身順協于家忠貞于國公寶歷二  
年六月五日奏授出身累參選序數授令丞後任徐

州功曹參軍公紀綱一郡掾理六聯清貧而吏靡忍  
欺單步而人懷□□操心政理美譽溢彰枳棘非鸞  
鳳之所栖百里豈大賢之所任公性親立與志慕雲  
霞朝披黃老之書暮覽□□之要誼躡每賦譚蛻歸  
元身既離於俗塵名定□於紫府公咸通七年十二  
月一日終於輔興里春秋八十矣八年正月廿五日  
葬于長安縣龍首鄉嗚呼寒暑忽侵纏綿數載針藥  
無瘳百齡斯泯嗟夫盛衰生死實可痛哉乃爲銘  
波瀾不息逝水孱孱浩浩悲風摧□何遄于生永訣

一往無還

石刻

溫憲

憲詩人庭筠子光啓中及第山南從事

唐集賢直院官榮王府長史程公墓誌銘并序

程氏之先出自伯休其後程嬰春秋時存趙孤以節義稱故奕世有令聞公諱脩己字彥立曾祖仁福左金吾衛將軍祖鳳婺州文學父儀蘇州鹽博士公幼年英敏通左氏春秋舉孝廉來京師遊公卿名人間能言齊梁故實而於六法得姿稟天賜自顧陸以來質絕獨出唯公一人而已太和初陳丞相言公於昭獻因授浮梁尉賜緋魚袋直集賢殿累遷至太子中

舍凡七爲王府長史趙郡李弘度有盛名嘗有鬪雞  
爲其對傷首異日公圖其勝者而其對因壞籠怒出  
擊傷其畫李愕然大駭昭獻常所幸犬名盧兒一旦  
有弊蓋之歎上命公圖其形宮中畋犬見者皆俯伏  
上寵禮特厚留於祕院凡九年問民間事公掛口不  
對問取內府法書名畫日夕指擿利病上又令作竹  
障數十幅旣成因別爲詩命翰林學士陳夷行等和  
之盛傳於世公於草隸亦精章陵玉冊及懿安太后  
謚冊皆公之書也丞相衛國公聞有客藏右軍書帖  
一幅衛國公購以千金因持以示公公曰此修己給

彼而非眞也因以水瀉紙扶起果有公之姓字其爲  
桃杏百卉蜂蟻蟬雀造物者不能爭其妙□其際仍  
備盡法則筆不妄下世人有得公片迹者其緘寶航  
翫□□古昔公嘗云周侈傷其峻張□□其澹□□  
盡之其唯韓乎又曰吳恠逸元通陳象似幽悉揚若  
痿之強起□許若市中鬻食性夷雅踈澹白哲美風  
姿趙郡李遠見之以爲沈約謝朓之流大中初詞人  
李商隱每從公遊以爲清言元味可雪緇垢憲嚴君  
有盛名於世亦朝夕與公申莫逆之契高遊勝引非  
公不得預其伍公又爲昭憲畫毛詩疏圖藏于內府

以咸通四年二月一日遺疾歿於京國里第享年口  
十九先娶萊氏有子三人長曰進思鄜州甘泉主簿  
次日退思詩歌尤高妙與乃公迹殆相亂又其次曰  
再思於小學靡不通工篆籀其爲狀澹古道健後娶  
石氏有女二人長適滑州韋城縣尉景紹一女幼石  
氏亦先公而亡以其年四月十七日葬于京兆府萬  
年縣姜尹村憲嘗爲詠蛺蝶詩公稱其句因作竹暎  
杏花畫三蝶相從以寫其思其孤以憲辱公之丐遂  
泣血請銘銘曰

五曜垂晶羣山降靈鍾茲間氣歸我昌庭遇物生象

乘機肖形情通盼蠶思入微冥顧陸遺蹤李張舊轍  
芳塵寂寥妙迹蕪沒故筆空存神毫永輟千齡万祀  
慘淡夷滅

石刻

劉從周

從周乾符中光祿卿

劉氏幼子葬銘

大唐乾符二年歲次乙未四月廿日壬申彭城劉氏  
幼子年七歲終于昇平里之私第雉齒未名小号阿  
返曾祖諱廷珎左驍衛大將軍封東陽郡王食實封  
二百戶興元元從著勳當時祖諱沔太子太傅贈司

徒功書竹帛事載國史故不備述也父曰從周光祿  
卿致仕絕跡名利嗚呼汝襁褓敏慧戲弄有方逮至  
齠髫舉動老成方欲傳汝箕裘慶爾門閭吾負神明  
謫汝何速以此哀慟痛何能已以其月廿四日卜兆  
去吉祔葬于長安縣第五村親伯杞王傅德章之塋  
扶輿號天泣血塋隧乃爲銘曰

阿返阿返壽何促焉詩書禮樂方期訓焉未就吾志  
奄歸黃泉蘭萎珠碎兄姊推焉龜筮告吉窀穸是遷

慮變陵口寘于墓田

石刻

劉氏室女墓銘

唐乾符二年歲次乙未七月十日庚寅彭城劉氏室  
女享年二十終於昇平里之私第曾祖庭珎右驍衛  
大將軍封東陽郡王贈右僕射祖沔太子太傅贈司  
徒勳望一時事載史策皇考德章杞王傅御史中丞  
嗚呼小號定師卽中憲之季女也懿毓生知柔順幼  
備動合規矩雅爲人師喜愠未常形於色是非罕曾  
恣於言唯以靜默自修孝悌雍睦實闈闕之令淑訓  
家之軌躅者也嗚呼福善無徵遭疾膏肓伏枕未久  
奄忽而謝日月流邁龜筮有期以其年八月廿八日  
祔葬于長安縣第五村之先塋余追念無已痛徹心

靈泣血叙哀寄于墓銘神道降祥挺秀明德禮法是  
遵慈仁被物彤史流芳垂爲令則親叔銀青光祿大  
夫光祿卿致仕劉從周記

石刻

楊檢

檢乾符中京兆府兵曹參軍

唐故嶺南節度使右常侍楊公女子書墓誌

□□諱芸字子書隋越國公素之裔顯考公常□□  
君諱發第七女曾祖公諱藏器邠州三水□□□祖  
公諱遺直贈右僕射府君名重於時□□□世子書  
之諸姊皆託華胄如戶部侍郎翰林學士劉公承雍

五朝達皆子書之姊聳子書自童年則不隨稚輩戲  
遊端默靜慮有成人童不甚絲竹寡翫好諸兄所習  
史氏經籍子集文選必從授之覽不再繹盡得理義  
勤口隸學巧于女功喜不形色温口口容內外推敬  
稱非凡女會乾符五歲夏京師癘疫子書之兄姊姪  
妹危疹者相次口口子書省祖口悴憂勞內侵疾不涉  
旬竟厄天壽以六月七日終于口福里第春秋廿十  
月廿八日葬于長安縣南原姜允村嗚呼天與其淑  
而不與其壽爰口灼灼忍落疾風四氣輪謝時可辨  
乎於是其兄慟血而銘曰

華五族兮成吾之妹悴吾門兮德亦其除吁嗟天兮  
付不俱口生有恨兮泣血漣洳

石刻

孫溶

溶樂安人

唐故前河南府錄事天水趙公墓誌銘

嗟夫瑞雲將布俄散彩於晴空皓月正圓忽摧輪於  
天上卽知吉氣難駐祥光易虧非唯動息之所瞻實  
亦神靈之所歎何殊俊造奄及泉臺將紀嘉猷難申  
執筆公諱虔章字敬彝京兆長安人也昆仲四人歡  
侍左右公異才也量崇大節不愧小慈禮樂生知敏

捷天受視扶空之蟠棟不足崢嶸觀截海之螭梁未  
爲碑兀鳳鶴寫雍容之質水壺灑洞澈之風纜及弱  
冠之年寵授紉曹之貴莫不清兼洛水秀台嵩雲譽  
滿東畿名傳西□必謂壽等五千之仞榮稱百萬斯  
年何期清史而猶□標奇黃泉而已爲歸路嗚呼天  
虧一柱嶽折高峯斬□之劍刃剛摧射猿之雕弓絃  
斷並雲銷於瞬息方月□於逡巡比逝賢良未足爲  
痛以乾符三年九月六日告終于平康里私第而丹  
旒言旋蒼龜告吉擇用其月廿日葬千萬年縣寧安  
鄉三趙村祖之塋側也今則泉路永塞逝水不還慮

陵變遷略紀貞石其銘曰

肅肅令德雍雍至仁玉質纔成冰霜始新謹孝無比  
忠貞絕倫於家克儉於邦克勤詎料花發風起清晨  
來飄葉謝紅香浸塵龍城之側灞滄之濱一葬其中  
三趙爲隣風悲雨泣慘骨傷神泉門永固千春万春

古誌  
石華

莫雲孚

雲孚乾符中人

城山寺殘經幢

巨唐乾符三年歲在丙申十月甲辰朔十二日乙卯

功主莫雲孚并妻楊十一娘男惟信惟忠闔宅長幼  
等自捨淨財建立法幢奉爲國王帝主州縣家□□  
□□□□□其有餘分功德奉資一祠先靈并及亡  
男惟簡等願早超淨域永離□途同□□福□□□

□歲

湖州府志

張賓

賓中和中節度駟使官

唐故幽州隨使節度押衙遙攝鎮安軍使充綾

錦坊使銀青光祿大夫檢校國子祭酒兼御

史中丞上柱國平陽郡敬府君墓誌銘并序

府君諱延祚字延祚其先平陽郡人也繁宗盛裔不  
廣叙焉遂授隨使節度押衙遙攝鎮安軍使充綾錦  
坊使於戲壽之與天不保黃髮孝諱全紀充北衙將  
判官曾祖諱包攝幽都縣令祖諱輝守宣州右丞相  
業富韜鈴才多經濟忠勤王士無徇家私府君性稟  
冲和志惟端厚早備成人之器德懷鑒物之明口藉  
材能具精官業謙以自牧惠乃知人不恃寵以驕身  
不怒而臨下轅門旌能移掌坊務於是繕修戎器淬  
勦鋒矛私用無闕於軍資戈鋌蓋兼於武庫久處繁  
難之任尤彰廉儉之名時推貞幹咸仰清勤是以洪

鍾發而聲揚自遠寒松茂而秀且不羣於戲修短有  
定榮辱是常以中和二年九月十八日終於昌平縣  
界永甯村之私第享年卅有六以中和三年二月十  
一日葬於薊縣界會川鄉鄧村里之原禮也夫人清  
河郡張氏行潔冰霜德芳蘭桂情殷葛藟量協螽斯  
冀期金石偕韻琴瑟無虧不圖杞梓毀摧絲蘿無託  
痛傷熟質恨切蕙心有子三人長曰行修充親專副  
將次曰行益充親事虞候次進郎並性行溫澆言無  
杪菜悲號毀性哀慘過情泣血漣如邁王脩之社崩  
摧莫制同隱之以感隣夫人哀纏荼毒痛絕肺肝嗟

乎老之將至獨存秀而不實先殞猶恐陵谷遷變棄  
海有更刊綿綿之清譽記鬱鬱之佳城乃命瑣才紀  
諸豐石銘曰

誰謂斯人罹此禍端誰爲權笑誰爲愁顏名留世表  
神歸不還記誌景行恐變何山

古誌  
石華

徐膠

膠廣明中鄉貢進士攝滄州司馬

大唐故幽州節度要籍祖君夫人宏農楊氏墓

志銘并序

楊之受氏宗於有周始於魯史所傳迨乎唐年攸盛

歷代軒冕嗣光簡書今不復云矣曾祖昇皇不仕祖  
輔皇攝幽州安口縣令父瀛皇不仕夫人家奉詩書  
門績青紫漬潤從生之善道聽聞未教之清規故動  
叶禮經言作世躅洵乎成人之歲以父兄之命歸于  
祖氏及移彼天益煥明德率盡乃性爰穆其親加以  
學道自怡探微愈晦閨門坐肅埃塹潛融故夫人之  
子曠不仕王侯高眠藪澤洞啓老莊之扇鐻退全箕  
穎之性情魯連三辭不口譚笑萊子五綵自悅晨昏  
笥中之龜質堪悲天上之鶴書莫起嗚呼時當訛薄  
人寡坦夷竟以勞生罕躋中壽而夫人逍遙外物怡

澹安貞克保遐長諒因頤養以廣明三年七月十四  
日終于滄州清池縣善化坊享年八十五是歲改元  
中和以十一月八日葬於所終之邑立都鄉流祥里  
惟瞳跡類漂梗禮至茹荼情疚送終資自良友塗芻  
潛備松檟克完其道實高其孝彌顯夫人女二人長  
適李氏次適劉氏咸稟夫人之明勗成□□之嘉猷  
瞳與余交分不渝素風備熟俾其紀石難讓濡毫銘

曰

□□□儀符彼內則進盥逾恭柔聲靡忒雍穆其道  
馨香在德閨閭益清□裳去節暗謝繁華堅歸寂默

壽考保終希夷自得誠子遁跡遠辱全生輕辭世網  
靜褫塵纓上士斯達口者何營伊誰砥礪本我高明  
碧岫無業滄郊寄坐難詳彼美空愧斯銘

常山貞石志

### 史歸舜

歸舜光啓間鄉貢進士

隨羅尼經石幢讚

并序

佛興西土俾萬有以歸真像教東流與羣迷而正覺  
爰從達者旨是得除疑慕善求安應聲聞嚮當縣近  
因兵革實有侵凌大戎恣暴口之心人口致流離之  
苦唯茲郭邑備以堅牢旣大振雄謀實內依佛力有

清信士張宏建等並理探空界性入元關每動樞機  
事皆宏益是以人稱領袖眾乃依歸俱在艱時同□  
□聖□□□勢迴戈甲氣殛妖氛□□隕於狼星朝  
再聞於魚梵今則邑居不動庶類無傷由是志誠皆  
蒙福覆沉思至理何路致耐無非樹善言徵久遠誘  
人歸正斯所謂顯靈驗於一時□□□於後世也是  
邑人等各出淨財遠求良匠造玉石幢一所上剎佛  
頂尊勝陀羅尼立於康衢之內是上報慈悲而旁返  
慶祚雕鏤既畢合吉公門時縣尹宏農公軒蓋始臨  
缺五於金人妙道無不□通樂聞其請尋而允之此  
字

亦建善之有因眾功之合就也遂於四月八日會同  
緣而立之時光啓二年丙午歲也歸舜獲逢勝事敢  
不讚揚遂錄其實耳

佛有聖力人莫能知一句一偈大慈大悲无量功德  
不可思議言以災難尋聲救之是邑之人忽離寬孽  
念彼奔衝憂其歿絕金鼓屢振鵝鶴頻役不告諸仏  
何由見雪非無應兆口有降臨豺虎潛遁氛埃自沉  
靡言在命實由信心既免災難道情轉深但念有情  
無不霑福何以報之莫施瓊玉靈蹤聖跡唯紀與錄  
傳於後時言之不足立其貞石刻以眞言口揚妙道

救獲無邊正覺正果三千大千報仏之所長爲福田

常山貞  
石志

唐文拾遺卷之三十三

榮祿大夫三品頂戴前分巡廣東高廉道加四級臣陸心源輯

張禕

禕昭宗時歷官兵部尚書舊書有傳

兩龕題名記

聖上西巡之辰余自金門飛騎追扈大駕中途隔烟  
塵遁跡及中秋方達行在由青瑣判吏視事未浹旬  
復歸內署明年自貳口授是官又明年出綰是職奉  
命先鑿輅之神都俾緝舊綱行次口缺遇軍變乃問  
道俟通於茲郡缺是塵清路遠山秀川明方與缺博

酣於臨眺忽有賁函而登

缺

出天書以示促赴行朝

將

缺

是境得無紀焉表兄巢湖處

缺

薛瓚前進士封

舜卿姪曙同

缺

中和四年甲辰三月八日尚書右丞

判戶部張禕記時爲姪曖等修釋迦像遂刊於此

金石苑

### 戴師顓

師顓僖宗時人

戴府君墓誌

并序

府君諱芳魯國郡人祖諱蔽父諱素府君素之第四子娶東海徐氏育子五人二女三男長子師顓次子

師旭少子師敏府君溫良恭儉讓志惟清雅惟孝惟  
忠琴酒戴不仕何圖積善無徵凶釁春秋六十有三  
寢疾醫藥無效大化有終中和三年秋八月廿五日  
終至其年季冬之月初五日丁酉吉辰窆爲吳郡東  
南華亭縣北廿二里去張管墩五里莞沼鄉城山里  
進賢村洞涇西一百卅步新宅之東南而葬新塋禮  
也三男泣血二女哀號長子師顛等恐歲月久遠陵  
谷變移不託時世今乃刊巖爲記銘曰

晚暉西落流水東馳存亡永訣逝者無歸萬古千秋  
墳壠巍巍是誰書雙鯉魚是誰讀雙白鶴鯉魚入

深泉□□□□□□

山刻  
叢鈔

李景莊

景莊乾符中刑部侍郎

應配流人就近奏

配州府流人流刑三等流二千里至流三千里每五  
百里爲一等准律諸犯流應配者二流俱役一年稱  
加役流三千里役三年役滿及會赦免役者卽于配  
所從戶口例今後望請諸流人應配者依所配里數  
無要重城鎮之處仍逐罪配之准得就近

唐會要  
四十一

高駢

全唐文八百二有傳

尋訪褚遂良後裔護喪歸葬奏

愛州日南郡北五里有故中書令河南元忠公褚遂良墓前都護崔耿大中六年因訪邱墳別立碑記云顯慶三年歿于海上殯于此地二男一孫祔焉伏乞尋訪苗裔護喪歸葬

唐會要四十五

致周寶書

伏承走馬已及奔牛今附蠶一瓶葛粉十斤以充道

路所要

南部新書

逐西川僧法進判

斷臂既是凶人刺血必非善事貝多葉上不許塵埃俗子身中豈堪腥膩宜令出境無得惑人與一繩遞

出東界

北夢  
真言

司空圖

全唐文八百七有傳

李公磻行狀

公有出倫之才爲時輩妬忌罹於非橫其平生著文有百家著諸心要文集三十卷品流誌五卷易之心要三卷注論語一部明無爲上下二一作三篇義說一篇倉卒之辰焚於賊火時人無所聞也惜哉陽春白

雪世人寡和豈虛言也

北夢  
瑣言

胡曾

全唐文八百八有傳

代高駢檄南蠻

欲慕平交妄希抗禮何異持衡秤地舉尺量天越嶺  
新州牂牁故地不在周封之內非居禹跡之中曩日  
邊將邀勳妄圖吞併得之如手加駢拇失之若頷去  
贅瘡九牛之落一毛六馬之亡半毳何足喻哉

鑿戒  
錄

白宏儒

全唐文八百十六有傳

請廢諸太子廟附莊恪廟奏

按此奏見唐會要卷十九今存其目文與全唐文白宏侯作同不錄

黃璞

全唐文八百十七有傳

觀察使檢校司徒兼御史大夫陳巖墓誌

府君以大順三年薨春秋四十四江夏黃璞爲名士傳以伸之又爲神道碑以明之府君諱巖字夢臣曾祖父諱宏字文保爲當府司馬王父諱好古贈太子舍人父諱簡字言史贈工部尚書又贈羽林大將軍

太夫人贈會稽郡太君又贈衛國太夫人府君幼而  
徇齊不爲兒弄長逢離亂思埽妖氛登□則神鬼宵  
奔揮劍則機槍星落廉使滎陽公鑑夙慕英風累咨  
□畫請爲都團練副使仍判清源又三發疏章請□  
交代滎陽公尋告疾北歸公威以肅衆寬以撫□賣  
刀佩犢再揚冀遂之風左誦右絃大闢文翁之化合  
浦靈珠睽□光於五夜漁陽瑞麥吐秀色於連年家  
家吟多袴之謠處處詠如坻之什朝廷嘉歎就加工  
部尙書兵部尙書未幾又加右僕射左僕射不二年  
又加司空噫雖則委珠道著益彰衣錦之榮然而治

水功成未捧陶鈞之命甘棠勿翦講樹空存哀哀生靈何嗟及矣夫人錢塘范氏出自令門婦於華族口垂範於金閨驟霑榮於石窠非惟敦敬孝悌多奉以家規至於恤物愛民亦得於內助口封錢塘郡夫人有六子長曰延晦太子司議次延口一子出身守閩縣尉次延冕陸王府參軍次口口次延曦皆秀掩稽松茂踰緒柳儼然在茲柴毀踰禮吾知聚星之德其未艾矣有女二人長適口判滎陽公口適太子正字董承和卽瀾東廉問相國之令子孫男三人長曰肇任長樂縣令次曰口檢校工部尙書守漳州刺史兼

御史大夫材質豐傑字量沈厚府君以景福二年八月十四日唐於閩縣敦業鄉太平里□□山之陽銘曰

大滂仁化蘇凋俗生植霑如膏雨沃方嘉九年重戴天豈□一旦□□□閩山上閩山足佳城鬱鬱松阡

綠逝者徒云可□錄

福建通志

顏蕘

全唐文八百二十九有傳

自草墓誌

寓于東吳與吳郡陸龜蒙爲詩論之交一紀無踰龜

蒙卒爲其就木至穴情禮不缺其後卽故諫議大夫  
高公丞之故丞相陸公展二君於薨至死不變其餘  
面交皆如攜手過市見利卽解攜而去莫我知也復  
有吏部尙書薛公貽矩兵部侍郎于公兢中書舍人  
鄭公撰三君子者余今日已前不變不知異日見余  
骨肉孤幼復如何哉

北夢  
瑣言

鄭谷

谷字守愚宜春人光啓三年進士乾甯中仕至都官  
郎中

雲臺編序

谷勤苦於風雅者自騎竹之年則有賦咏雖屬對聲  
律未暢而不無旨諷同年丈人古川守李公朋同官  
丈人馬博士戴嘗撫頂歎勉謂他日必垂名及冠則  
編軸盈笥求試春闈歷干於大匠故少師相國太原  
公深推獎之故薛許昌能李建州類不以晚輩見待  
預於唱和之流而忝所得爲多游舉場凡十六年著  
述近千餘首自可者無幾登第之後孜孜忘倦甚於  
始學也喪亂奔離散墜略盡乾寧初上幸三峯朝謁  
多暇寓止雲臺道舍因以所記或得章句綴于牋毫  
或得於故侯屋壁或聞於江左近儒或祗省一聯或

不知落句遂拾墜補遺編成三百首分爲上中下三卷目之爲雲臺編所不能自負初心非敢矜於作者

康駢

駢字駕言池陽人乾符四年登進士第官至崇文館校書郎

劇談錄序

駢咸通中始隨鄉賦以薄伎貢於春官爰及竊名殆將一紀其閒退黜羈寓旅乎秦甸洛師新見異聞常思紀述或得史館殘事聚於竹素之間進趨不遑未暇編綴及寇犯天邑挈歸漁樵屬江表亂離亡逸都

盡景福乾寧之際耦耕於池陽山中閉關雲林罕值  
三益而又環堵之內闕於墳典思欲叙他日之遊談  
迹先王之軌範不可得矣然則平昔之道本爲於文  
旣未能立匡世之功名又安得舍窮愁之翰墨因想  
時經喪亂代隔中興人事變更邈同千載寂寥堙沒  
知者漸稀是以耘耨之餘組成前志所記亦多遺漏  
非詳悉者不復叙焉分爲二編目之曰劇談錄文義  
旣拙復無雕麗之詞亦觀小說家流聊以傳諸好事  
者乾寧二年建巳月池州黃老山白社序

足本劇談錄

蔡德章

德章廣明時人守藤州刺史持節藤州諸軍事

唐故朝議郎前行宣州南陵縣尉柱國張府君

墓誌銘 并序

夫銘者稱其美也記歷年代載標行德因夫子讖秦  
始皇後必開發吾墓顏回以下乃誌讖詞於墓內使  
始皇見之知我先師聖焉又至後漢滕公夏侯嬰將  
葬佳城駟馬不進而鳴乃掘其下遇有穴室中得石  
記亦有讖文是以先王製禮勒石于泉慮陵谷有遷  
以明柩之德位也公名師儒其先清河人也曾祖景  
仁祖昊父南素並不仕公卽家任之子也器宇凝正

容範端華檢性依方飾躬由禮進身而先物約已而  
厚人言合詩書動遵法式自少小以勤學苦節而立  
其身始自牙府從職能以幹敏奉公前後憲長無不  
委用或以糾繩之政而立紀綱或竭節推刑爲霜臺  
之領袖優滿授坊州昇平縣主簿秩滿授宣州南陵  
縣尉兩任之政恪著公勤太守常以重難而委寄也  
邑人遵凜惕懼於製錦之威賦稅及期一境無逋懸  
之簿旣之罷任方欲歸輦在苒未進適值浙江淮海  
等道而多寇逆所在徵兵憂以路虞不通且駐宣城  
之側以乾符五年七月初遘疾至其年八月一日終

于宣州權居之所享年七十有二時第三男溥自京侍從至南陵數載不曾暫闕晨昏侍疾求鑿而忘寢食公歿之後護喪歸京涉歷山河皆口途步周迴委曲三千餘里二百餘晨方達家邑孝道之志此男偏臻曾參之儀抵之此也公之先域在於馮翊近載緣諸子從職多在諸方南北駢馳離鄉日久遂逐便移家於上都崇仁之里靈筵之禮備之于堂以廣明元年十月五日乙酉吉辰歸葬於萬年縣寧安鄉新塋之禮也夫人王氏以其糟糠之情饗祭從便阻以地遠恐後違時不赴馮翊舊鄉慮其子孫闕春秋之祀

而從近焉乃卜新阡在鳳棲原也防其異日無虧靡  
掃之儀子孫團圓不墜松楸之主伏以賢夫人太原  
大族之家引駕王公魯之女也懷敬姜之志襲梁鴻  
之風嘗以內循機筭之勤外豐賓客之膳親族仰重  
四德不虧有男四人長曰洙見義武軍節度都押衙  
銀青光祿大夫檢校國子祭酒前隴州長史兼御史  
中丞屬以時當沙陀悖亂逆臣李國昌侵逼邊陲節  
度使王公知洙有韜略之機籌筭之握委領兵士剪  
伐羗戎果獲收復鎮城招攜戶口上聞帝闕表以殊  
功卽領郡符必酬前効不久之際新命當臨公之此

子光前絕後迺是德章外甥女習備執德行請以爲  
誌次子曰汾見豕府從宦而有出羣之藝主執奏章  
頗立勤劾卽有榮遷次日溥乃是侍從南陵無虧晨  
省護喪歸邑不憚苦辛亦非久必榮家族也次日提  
與義武軍節度王公弟左神策軍糧料使弘紹同勾  
當供軍之務並各負凌雲之氣皆懷孝道之心盛德  
出於眾人光顯彰於前代有女一人媧同州押衙王  
袞尋終遐壽袞及女孫恣在兒孫二人長名難胡卽  
男洙之子也年未弱冠亦是成器之寶豹澤貴顯之  
材次日周兒乃是溥之子也見在襁褓孫女二人長

適高翊守職鸞臺之內官授中郎之榮次女阿宜口  
口及笄公時當盛族年至從心雖歿殊鄉得歸帝里  
四男泣血一婦摧傷備舉哀歌靈儀崇列丹旒攸攸  
送歸新闕嗚呼水無返注日不東迴泉門旣掩永而  
不開刻石爲銘乃爲頌曰

溫溫府君令德出羣其聰莫比其孝有聞冲和茂著  
節操松筠兩佐名縣頗立殊勳方欲竭効遽有替人  
罷秩之後偶染疾身豈期倏忽異口之魂哀哉上蒼  
何至于怍行善云吉豈降其殃離京之日骨肉斷腸  
不料永隔生死分張號天口及叫地空傷卜其宅兆

遷赴立堂蕭蕭松柏杳杳白楊泉臺將掩隴樹無光  
葬於新闕永鎮龍崗石刻

鄭貽

貽昭僖間人

鹿門詩集叙

并山川英淑奇麗當塞阨之衝古多豪士專武功健  
馬垂光字內未有鉤錦編一作秀絕擅聲詞翰者君出

其中翕輕清以爲性結冷汰以爲質煦鮮榮以爲詞  
偏於逸歌長句駿奔踔厲往往而劇李白杜甫死非  
君而誰哉君諱彥謙字茂業咸通二年進士以文章

入仕操官履潔如其爲文晚從王重榮辟從事河中  
歷蘄絳諸州刺史所至有能績光啓七年隱居鹿門  
山以著述爲任與施肩吾希聖薛能大拙爲詩友而  
二君皆以爲不逮折行與交君卒藁多散落予爲輯  
綴僅二百餘篇黃鐘玉磬咸其章章者因題曰鹿門  
集析爲三卷武城鄭貽序

席本  
唐詩

### 韓義賓

義賓深州人仕成德節度判官檢校太子左庶子御  
史中丞卽忠獻王之五世祖也

唐定州別駕程君

士庸

墓誌銘

君諱士庸字仲謙定州安喜人也系高陽而綿緒氏  
列國以興家自茲以降世際明德故能高姻美爵歷  
秦漢而載盛崇基累構跨魏晉而逾顯高祖結定州  
刺史曾祖日華橫海軍使祖懷直歸誠王皇考權邢  
國公或分土主戎威率數郡或陪武祗命康惠四方  
君含璋以挺生稟和以凝氣弱不好弄早擅夙成語  
嘿之機帥心則遠孝弟之至卽性載深道希四科文  
膽百氏好賢之性得諸緇衣惡惡之心求之巷伯加  
以神姿恢岸望之儼然雅氣貞夷聽言則厲賁秀正  
園有聲邦黨固已墻幾數仞器踰萬頃者矣齒壯知

名州辟主簿治未浹辰民謠已著允可謂舉契唯良  
功成共治者也義武節度尚書王公綏蒞雄藩雅君  
令問下車之始辟君掌書記云今日之事猶李彊之  
收君平望便降意成孤敢言爾其取重於時多類此  
也遂以價重見珍轉定州別駕君乃導德齊刑威疆  
恤寡千里移風四民樂業民頌政成君之力也王公  
嘗從容眾中謝君而言曰海沂之康昔自王祥邦國  
不空今復相賴因言是公此州管夷吾也廊廟之才  
若置之周行則張茂先之流矣而道消當年運潛初  
九惜哉及王公赴難京師君亦養性工華慕七子之

優游事三徑以嘉遯前言往行必得之於閨門温恭  
孝友亦穆之於宗黨宜延百壽木鐸烝民而福應宜  
嘿寢疾彌留春秋七十有八以中和元年十月廿二  
日卒於慈仁里宅遺文後事作範當時子巖孫秀等  
粵以其年十二月朔日遷窆於博野先塋惟君慎終  
追遠之風緯文經武之略信可以方衡四公齊驅萬  
石矣門生邢仁等悲云亡以潛目軫遺愛以茶心敬  
刊泉石用昭德音敢作銘曰

同源濬起分流遠扇周王修和程侯利建自茲以降  
官姻世緬於穆我君含中作彥義惟誕性孝以立身

識周先覺學廣前聞貞心潔玉秀氣貫雲龍潛或躍  
蟻屈載伸時惟聲恥運逾道消反躬紛靄養志蘅臯  
孺心遠慕鼓腹長謡育川比量望月齊高紛綸倚伏  
冥昧遭隨謂仁者壽曾不憖遺泉官一設龍路恆悲

貞徽有篆永思無虧

新安文獻志

張士賓

士賓易武軍推勾官朝散郎行太子司議郎

大唐義武軍節都知兵馬使銀青光祿大夫檢

校工部尚書兼御史大夫持節易州諸軍事

易州刺史上柱國安定縣開國伯食邑九百

戶程公巖勳德碑頌

於戲君非臣無以化化臣非君無以贊贊惟天正明  
命不絕有唐篤畀純臣以靖國難克蕩民沴將底于  
成我太原王敬統舊服惠周于下下罔不格乃天祐  
紀元甲戌春正月用都知兵馬使程公出復大命元  
元以貞集大和也先是賊溫遘亂明毒中夏力政血  
刑覆忠良殖奸宄蒸人側側不貳率乃戮王越在東  
土受制宇下克懷弗寧邊在王室誕宣我化靡由爾  
凶惟公敷聞帝庭奉若元命帝曰休哉正侯良哉厥  
使可持節易州諸軍事易州刺史封安定縣開國伯

食邑九百戶表獻臣也越茲元惡明肆虐羣大侮王  
度擅熬無人薄三州威五長摺紳管管不自卽乃工  
王執在厲階罔佛祇命命我亞旅咨我近藩端恤遺  
人人思反德式載無欲歸于本朝朝廷嘉茂功錫不  
命授公檢校工部尚書兼御史大夫詔曰懿爾巖哉  
審奉天威保乂邦土是用司國樞威儻奸回改革風  
俗是用總朝憲公固讓不獲祇奉天之明命維時羣  
盜貌聚于野公文招徠武殄暴服如化人謏不虞廬  
廬旅旅以宴以處士訓業農力穡工就務商通貨四  
者各正爾下日用乃蕃踰年羣吏更告天雨淫降頌

湧汴岸波積如阜奔灌乃雉骨恐爲魚其日固久公  
聚人行水度力陳王啓元導流事若天造層城巖巖  
居人坦坦庶德合于無疆歲庚午冬十一月溫益逞  
凶自汴襲趙殍軼殫寶度劉暴骨公乃贊王輯睦爾  
鄰推功于晉凡事得請命焉由是屯于高邑廕于栢  
鄉執忠奮威罔敢加害振旅還定王用嘉享時夏大  
旱滌滌甫田百穀如焚人曰祈土龍公曰非旱備乃  
貶躬之食勤人之瘼靡神不寅崇朝而雨秋河朔大  
饑易有年也壬申春二月賊臣守光戎性貪饒厚厲  
其人與溫濟惡爰以其黨伺間來寇放兵流毒延于

齊民民用齋咨涕洟籟公公曰不戢乃暴負乃人爰  
請于王合從晉趙會王師于易水之上恭行伐也獨  
夫惴惴天用勦焉乃破祁闕下涿鹿二豎借遁執其  
大醜馘于軍門敦奉王誅保和人極甲戌之春燕寇  
抵平疆場安靖或曰厚賦人公盡人篤焉對政不賦  
乃聳善抑惡發滯刊佚歲惠昭利六教旣備孳孳等  
心於是奏記于王王獎之文訪于趙趙崇之請諧六  
州允奉于晉賊不我制公用哆然由是匹夫匹婦蕩  
伏草莽越踐公境宣服公威惕惕瞿瞿攝進成序若  
公在首上集下望申命用良易人熙熙嗜化益休是

歲冬惟晉承制錫命我王用胙白茅副以金鉞昭崇  
武功允正師長進公銀青光祿大夫上柱國陪武主  
戎總經外政參酌彝典敬揚王休緊公德載于人人  
以蕃殖翼贊方伯翦除大凶聖咨乃賢神被乃祿其  
惟有終旨哉易中耆老師錫言曰奸臣反常迭寇東  
土人用慘黷殆無指告維公牧我有邦天眷爾下爾  
有君臣公正爾有父子公保爾有災厲公奠爾有稼  
穡公成維公疇依易大圯也廣曰昭茂德崇豐碑阜  
成于文庶永于世克建藥石勗揚頌聲頌曰

維君配天維臣配君  
嶠嶠我公爲君  
虎臣翼襄霸府

奄有世勳大盜囂荒我東鄙孔填不夷元元靡恃  
易人恃公乃有父子泔水湯湯我沴載懲嘆魑炎炎  
我年載登我用有孚爾無不承維公之德浹于爾衆  
維公之勳朝野攸重貞石峩峩永以垂頌

新安文獻志

### 盧知猷

知猷字子驀簡能子第進士登宏辭文詞瞻麗科蕭鄴  
鎮荆南劔南辟掌書記後官至戶部尚書太子太師  
昭宗爲劉季述所幽感憤卒贈太尉

### 盧鴻草堂圖後跋

相國鄒平段公家藏圖書並用所歷方鎮印記咸通

初余爲荊州從事與柯古同在蘭陵公幕下閱此軸  
今所歷歲祀條逾二紀薦罹多難編軸尙存物在時  
遷所宜興歎丁未年駕在岐山涿郡子暮記

己酉歲重九日專謁大儀遂載覽閱累經多難頓釋

愁襟子暮再題

避暑  
錄話

張濬

濬字禹川本河間人屏居金鳳山後相僖宗昭宗時  
貶官復以左僕射致仕爲朱全忠所害

太廟宮懸依古禮用二十架奏

臣伏準舊制太廟含元殿並設宮懸三十六架太清

宮南北郊社稷及諸殿庭並二十架今修奉樂懸太廟合造三十六架臣今參議請依古禮用二十架伏自兵興已來雅樂淪缺將爲修奉事實重難變通宜務於酌中損益當循於寧儉臣聞諸舊史昔武王定天下至周公相成王始暇制樂魏初無樂器及伶人後稍得登歌會舉之樂明帝大明末詔增益之咸和中鳩集遺逸尙未有金石之音至孝武太元中四廟金石始備郊祀猶不舉樂宋文帝元嘉九年初調金石二十四年南郊始設登歌廟舞猶闕孝武建元中有司奏郊廟宜設備樂始爲詳定故後魏孝文太和

初司樂上書陳樂章有關請集羣官議定廣修器數

正立名品詔雖行之仍有殘缺隋文踐阼太常議正

雅樂九年之後唯奏黃鐘一宮郊廟止用一調據禮文每

一代之樂二調並奏六代之樂凡十二調其餘磬律皆不復通高祖受隋

禪軍國多務未遑改創樂府尚用隋氏舊文武德九

年命太常考正雅樂貞觀二年考畢上奏蓋其事大

故歷代不能速成今時近郊天式脩雅樂制度之間

亦宜搏節伏準儀禮宮懸之制陳罇鐘十二架當十

二辰之位甲丙庚壬各設編鐘一架乙丁辛癸各設

編磬一架合爲二十架樹建鼓於四隅當乾坤艮巽

之位以象二十四氣宗廟殿庭皆用此制無間異同  
漢魏晉宋齊六朝並用二十架隋氏平陳檢梁故事  
乃設三十六架國初因之不改高宗皇帝初成蓬萊  
宮充庭七十二架尋乃省之則奠虞架數太多本近  
於侈止於二十架正協禮經

唐會要  
三十三

胡密

密乾甯中靜南軍軍事判官前守靜南縣令

唐韋君靖碑

象緯降靈河嶽孕粹必能挺生人傑卓立功名爲當  
世之元勳作

缺三字

巨屏苟非鑒識洞達機變立微孰

能剗製奇功抑揚大節不有紀述缺來我太守司空

京兆公陶唐氏之遠裔漢丞相之後昆簪組相缺別

國史詳備家譜具存布在簡書略不覲縷公少蘊大

志長負缺刻鶴之工微恥雕虫之伎薄相時而動臨

事不疑懷缺精誠蔚凌雲之氣宇語仁智卽樗里罷

說較威猛則烏獲休扛嚮缺三若子牟之戀主從軍

立績同馬援之征蠻滅竈得孫臏之謀投筋祕缺二

之策揮劍卽蛟螭潛伏彎弓而猿狖啼號加以月角

衝衡犀文貫頂視缺□□堂堂罕正覲神彩赳赳無

雙實命世之宏材爲一時之英俊者也缺以乾符之

際天下騷然蝗旱相仍兵戈四起公覩茲遐僻人不

聊生遂合

缺

義口招安戶口抑強撫弱務織勸農足

食足兵以煞去煞泊黃巢侵陷京闕

缺

駕出幸成都

四海波騰三川鼎沸韓秀昇勃亂黔峽侵軼巴渝公

乃統

缺

義軍討除逆黨值秀昇盡拋舟楫圍逼郡城

公乃詳度機宜上下攔截依

缺三字

背水布兵兩面夾

攻齊心剪撲賊勢大敗我武益揚渝牧田公備錄奏

缺

節檢校御史大夫除拜普州刺史適值川師效逆

將臣專征

缺

台州絕其枝蔓恩旨加右散騎常侍除

拜合州刺史泊鄭君

缺

失律廣漢山行章尚書攻圍

當川故府主太尉丞相顧公累降命缺起應公統領

精銳二萬餘人虔告著龜申令士卒併破二十七寨

煞口萬餘人大振威聲上聞缺檢校工部尚書當州

刺史充昌普渝合四州都指揮靜南軍使累加刑缺

書右僕射公以臨郡歲久迺思退居上表陳情缺

詔旨褒獎特許量留加金紫光祿大夫檢校左僕射

扶風縣開國缺食邑三百戶公累銜缺魚符政茂

穎川化光河內邑有倉箱之詠俗多襦袴之謠求瘼

之缺害之心尤切其於駕馭英傑取舍權豪重仁

義如丘山輕金帛如泥缺老濟弱扶危逆旅如歸

遠湊鄭莊之驛遊人若市悉登漢相之門其

缺四字

乃

如此也每遇良辰美景月夕花朝張絃管以追歡啓

盤筵而召侶

缺四字

揖讓無譁樽酒不空座客常滿王

衍之冰壺轉瑩嵇康之玉袖靈顏

缺四字

恭又如此也

至若立功立事爲國爲家或坐運玄符或親提黑槩

缺五

兇徒謀必十全舉無遺策其剛毅果敢又如此

也當其賞功罰

缺五

甄獎公勤黜弃私黨三軍感德

萬眾歸心其恩威刑賞又如

缺三字

以海濤未息雲陣

猶橫常厚馭脅左綿戴實奔衝遂府使牒呼

缺三字

然

則士馬雖精其如城柵未固思大易習坎之義徵王

公設險之

缺

年壬子歲春正月卜築當鎮西北維龍

巖山建永昌寨茲山也

缺四字

郊原矗似長雲峯如斷

岸崖巘重疊瞪道崎嶇一夫荷戈萬人

缺二字

芟薙草

木相度地形人力子來畚鍤雲至連薈比屋万户千

門高

缺

溝洫煙籠粉堞霞捧朱樓龍吟笳角之聲雷

動鼓擊之響而又良

缺

民設規築城墻二千餘間建

敵樓一百餘所遐瞻天際豈龜形之

缺七字

能擬其上

卽飛泉迸出淥沼滂流崢嶸一十二峰周

缺八字

豈金

湯之比倫況乎糧貯十年兵屯數萬遐邇臻

缺九字不

闕可謂一勞永逸有備無虞公又於寨內西

缺六字翠

壁鑿出金仙現千手眼之威神具八十種之相好施

缺三字

迴祿俸以建浮圖聆鐘磬于朝昏喧讚唄於遠

近所謂歸依妙

缺

者焉其軍中節級將校等深達機

畧博識古今皆是公同志弟

缺

一心報國勦力從軍

咸奉渥恩皆霑爵賞或官崇題劔

缺

城或榮授金貂

或職兼霜憲雅符際會允屬休明請列署名銜庶缺

密叨依門館累戴恩光學淺文荒紀

缺

盡神愚智拙

錄缺

美事而猶疏輒將鄙俚之詞聊述

缺

將欲煥乎

不朽傳之無窮遂葺斯文乃鐫貞石大唐乾甯二年

歲次缺

二月癸未朔十九日辛丑記

金石苑

張珪

珪唐末鄉貢進士

唐故處士江夏黃府君墓誌

并序

府君姓黃諱公俊字子彥其先□□人也卽春申君  
歇之後長沙太守之裔孫高祖諱□曾祖諱恕祖諱  
法皆高尚不仕府君生而有禮體質魁□□□淳厚  
以孝義爲心處謙恭爲首家傳清儉鄉里稱□□晉  
代跨於江濱迄至今焉子子孫孫樂其耕釣可謂弓  
裘不墜於地也何圖暫纓微恙便至沉□藥石繼來  
畧無徵應以乾符五年十月十八日歿于義興縣善

拳鄉□塘里享年七十有六娶夫人袁氏淑性懿範  
婉婉和柔雅合閨闈美哉琴瑟先於府君四年而歿  
有男三人長曰約公早終次曰擗曰□□先人之風  
傳先人之業遠近欽奉靡不二云賢有女二人長女適  
吳郡張氏其女不幸早亡愛婿張公尙存昔念□□  
之□□遠及良辰次女歸于譚氏奔護喪禮罔失其  
儀嗚呼□□而知命矣因夫人袁氏之□□其吉  
日□□□□□□備於今日歸泉之所宜哉以□□  
□年丁亥歲十月□日窆窆枕夫人塋之北庚首禮  
也□寓□鄉黨請□誌難以讓陳才雖不敏聊構斯

文以紀其事刊于荆妃銘曰

大道冥口兮混然而成得之則壽兮口之則天全我  
慈孝兮終口口口上士所口兮下士則笑先口有言  
兮善口及嗣永介景福兮施乎後世

古刻  
叢鈔

王延嗣

延嗣閩王審知從子不受官爵閩將亡改姓唐隱居  
延平以五經教授生徒人呼唐五經宋乾德四年卒  
年九十四

諫閩王王審知書

天子播遷大盜蠶起跡其所由正緣朝廷政出多門

刑賞滋濫大王親舉義兵爲國平亂軋於賊臣決策  
入閩士卒將佐棄鄉井墳墓從王何所圖哉志於立  
功名耳今師旅暴露日久大王尙未策勳以旌戰士  
而首以爵命猥及無知之私親將士解體必矣

福建通志